



Äntwert vun der Justizministesch, Elisabeth MARGUE, op d'parlamentaresch Fro n° 2764 vum 11. August 2025 vum honorabelen Deputéierten Sven CLEMENT.

1. Wéi bewäert d'Regierung déi nei dänesch Propose vum ChatControl, déi de 14. Oktober 2025 soll ofgestëmmt ginn? 2. Ass d'Regierung der Meenung, dass d'obligatoresch Masse-Scanne vu private Kommunikatiounen, wéi et an der neier Propose virgesinn ass, mat de Grondrechter vun der EU Charta vereinbar ass? 3. Wéi steet d'Regierung zu der proposéierter Client-Side Scanning Technologie, déi d'Verschlüsselung vu private Messengerdénkschter géif ënnerwanderen? 4. Wéi bewäert d'Regierung d'Tatsaach, dass déi nei Propos d'Scanne vun "onbekanntem" Material mat experimenteller KI virgesäit, a wéi eng Risiko gesäit d'Regierung dobäi? 5. Wat hält d'Regierung vun der proposéierter Ausnam fir Regierungs- a Militärkonten, während all aner Bierger der obligatorescher Iwwerwaachung ënnerworf solle ginn? 6. Wéi eng Positioun wäert Lëtzebuerg op der kritescher Reunion vum 12. September 2025 anhuelen, wou d'Regierungen hir final Positioune sollen definéieren? 7. Plangt d'Regierung zesumme mat aneren EU-Memberstaate géint dës extrem Propose virzegoen? 8. Wéi kann d'Regierung garantéieren, dass Lëtzebuerg seng Positioun géint eng generell Iwwerwaachung behält, esou wéi et schonn a fréieren Äntwerten op parlamentaresch Froen ugi gouf?

D'Lëtzebuerger Regierung ënnerstëtzt d'Efforten um europäesche Plang souwuel fir de gemeinsame Kampf an der Europäescher Unioun géint Pedokriminalitéit, ewéi fir e bessere Jugendschutz am Internet. Och national verstärkt d'Regierung de Kampf géint sexuelle Mëssbrauch a sexuell Ausbeutung vu Mannerjäeregen e.a. andeems se der Police an der Justiz hei déi néideg Moyene fir eng effikass Strofverfollegung gëtt.

D'Regierung stellt awer fest, dass déi nei dänesch Propose rëm an eng méi intrusiv Richtung geet an de Bedenke mat Bezuch op de Schutz vun de Grondrechter vun de Bierger a speziell dem Dateschutz net Rechnung gedroe gëtt. Dës nodeems ënnert der viregter polnescher Présidence vum Conseil vun der EU eng Propose diskutéiert ginn ass, déi de Bedenke vun der Regierung zum Deel schonns entgéint komm war.

D'Regierung hält ënner deenen Ëmstänn un hirer fréierer Positioun fest. Sou insistéiert d'Regierung weider, dass am Kader vun engem neien EU-Reglement de Risiko vun enger genereller Iwwerwaachung vun de private Kommunikatiounen vun de Bierger muss verhënnert ginn an essentiell Grondrechter vun de Bierger wéi och d'Sécherheet vun de Kommunikatiounen garantéiert bleiwe mussen. Esou wéi den Avis vum Service juridique vum EU-Conseil iwwer d'Legalitéit vun der sougenannter "Chatkontroll", ass och déi Lëtzebuerger Regierung dofir fir eng méi cibléiert Detektioun vu pedopornographeschem Material.

Speziell bleift d'Regierung der Meenung, dass verschidden Dealer vum Text, ënner Anerem déi sougenannten „Uploadmoderation“, déi en Deel vun engem „Client-Side Scanning“ duerstellt, de Risiko vun enger genereller Iwwerwaachung net andämmen an och de Krittär vun der Proportionalitéit aus der Charta vun de Grondrechter vun der EU net erfëllen. Och dësen Dispositif schléisst nämlech ëmmer nach net aus, dass d'Kommunikatiounen vun all de Benotzer vun engem Service, och vun deenen, déi iwwerhaupt kee Lien mat enger Strofdot hunn, kënne gescannt ginn.



D'Regierung huet scho kloergestallt, dass se déi Positioun och weiderhi vertritt an se ass weiderhin am Austausch mat aneren Delegatiounen, déi eng änlech Positioun verrieden.

Lëtzebuerg, den 11. September 2025

D'Justizministesch

(s.) Elisabeth Margue